

HSET PHILIP

1.....

Bàu hmàih ka oh daq .

¹ Phaulô xam Timôthê , hapõng da Chuaq Jesus Christ , achih ka diq dõng mangai hadròeh da Chuaq Jesus Christ oe ta Philip , hloe xam ka mangai wèq tagop xam bài mangai patih : ² waiq oh daq jah kan catèm jah kan tabàih dech enh Boc Plinh aih Baq bèn hloe xam enh dalam ka Chuaq Jesus Christ !

Manoh Phaulô loq waq ka mangai Philip

³ Jò hmàng trùh oh daq , au hi manè apôi Boc Plinh au , ⁴ èh rìm yàng leq waiq khàn ka oh daq , au toq waiq khàn xi manoh lem bùi . ⁵ majah qmang ai enh baxèm trùh manòeq , oh daq khoe jah pajùm ta kan yòng kàn da Bàu lem enh aih trùh manòeq . ⁶ au loq qmòe rameh : Mangai ma khoe broq yiniq lem enh dalam oh daq , aih èh haq broq waq ka gèh trùh ta hi da Chuaq Jesus Christ .

⁷ Au hèm trùh diq dõng oh daq , qmang aih troq , majah qmang aih oh daq oe ta manoh cliac au , yac ka oe taqne caxi datoeq wì ma kàt au , yac ka jò au capoch cwaih rađeh rai anoe Bàu lem , aih oh daq hadai i pajùm ta kan tabàih dech Boc Plinh ma am ka au . ⁸ Boc Plinh wiang panhìn au yõc manoh loq waq da Chuaq Jesus Christ ðòeq hu loq waq ka oh daq . ⁹ Qnah hòem , biac au creo dang jò waiq khàn , aih broq qmang leq manoh loq waq da oh daq rai èh rai bàc oe enh dalam kan rabiaq xam kan hèm loq , ¹⁰ ðòeq hu loq hadro ngan trong leq ma yeo lem , ðòeq oh daq jah hliang hreo pi i qmòe ka nòe leq hu cwò ta hi da Christ . ¹¹ jah bình bauq plì taq ataq loh enh Chuaq Jesus Christ , ðòeq hu broq qngah rai manè apôi Boc Plinh .

¹² Manòeq kô , au enh pì oh daq loq , biac au qnang glàm manòeq kô khoe wiang broq ka Bàu lem jah chàc yi hangai . ¹³ Jaq diq dõng bài linh ma wèq ta hnim hadrah xam wì qnoeq diq jah loq au tiaq Christ dài wì ma jah yõc caxi datoeq kàt au qmang kô . ¹⁴ Bàc ngai ta oh daq hnoq jò au qnang oe qne caxi datoeq qmang kô , kiang wì haq i tam manoh lùì yeo bàc hòem enh dalam ka Christ , hùà lam anoe trong da Boc Plinh ùh lòm yùq qmòe cleq .

¹⁵ Joq , i qnah ngai taiq manoh tajênh tagrin dài wì haq majah lam anoe hnài mangai qnoeq loq ka Christ , mahaq hadai i mangai yõc manoh lem ðòeq hu lam anoe . ¹⁶ Bài mangai ma atiq kô broq xam manoh loq waq , wì loq Boc Plinh khoe ði au ðòeq hu wiang paqnhrang Bàu lem . ¹⁷ Da bài wì ma adroe tau , taiq kan plai , kan amùc toq ka rađeh , ùh diq ka manoh , xoh dèh canau tam ka au kan xalep . ¹⁸ Mahaq ùh troq cleq ! Yac ka qmang leq , yac ka patiah , yac ka joq qnàng , yiniq da Christ dua khoe jah lam anoe , aih iq dài manòeq kô au qnang lem bùi , khoe aih oe raq lem bùi hòem . ¹⁹ Majah qmang aih au loq , canòm ka oh daq waiq khàn xam canòm ka Yiang Hadròeh da Chuaq Jesus Christ wiang ti au , biac aih èh broq ka au rênh jah caqnaih , ²⁰ Au cajap manoh lùì qmang aih , yac ka trong leq dua au ùh i camaih cleq , mahaq jò leq tiah ka jò leq , rìm trong au ùh i crè cleq ka anoe , qmang aih , yac ka au rih yac ka au cachit , dua Christ jah qngah ta chac au . ²¹ Majah qmang aih , Christ aih kan rih da au , cachit aih kiang yeo troq ka au .

²² Patiah haq , au oe rih yôt ta chac kô , aih i lòeq tam ka yiniq au broq , dài au ùh qnì ràih trong leq . ²³ Au rahnhua taqne , enh lam oe ti Christ , aih ma yeo troq , ²⁴ mahaq au oe raq ta chac kô aih nhet ka pì . ²⁵ Au lùì qmang aih , au loq rađeh kô èh oe raq ti pì oh daq , ðòeq wiang broq ka oh daq jah lem bùi , jah kàn tam manoh lùì . ²⁶ ðòq jò leq au trùh hòem ti pì oh daq , pì oh daq jah yõc au hu broq nen ðòeq jah catèh rađeh yôt enh dalam ka Chuaq Jesus Christ .

Pariaq ep cajap manoh ...

²⁷ Toq rameh raq , oh daq ep acaq oe ma tajì ka Bàu lem da Christ, ðòeq yac ka jò au trùh hmàih ka oh daq, yac ka jò au arù , dua au jah loq oh daq moèq manoh yòng cajap ti dabau , moèq manoh ðòeq hadai wiang paqnhrang manoh lùì da Bàu lem , yac ka trong leq dua apaq ðòeq ka mangai ma tablêq ka oh daq taqnhrùq raðeh : ²⁸ Aih raq nòe hu patô wì aih èh hnhung lùch , mahaq oh daq jah dèch , bài yiniq aih trùh enh Boc Plình , ²⁹ enh dalam ka Christ , Boc Plình am ka oh daq xôq ramot ,ùh xài ðòeq toq hu lùì haq hi ðìq mahaq ðòeq oh daq wiang chiùq xalep ti haq ³⁰ aih èh pì oh daq hadai ep wiang chiùq kan tabroq tablêq qmang ka pì ma qnang hnoq, qnang hìa ajang au manòeq .

2

Rìh laq alàng.... ùh qnhèq qneq tiaq dua da Christ

¹ Qmang aih , enh dalam ka Christ tàng loq i cleq hu alòng dabau , tàng enh manoh loq waq loq i cleq ðòeq wiang dèch dabau , loq i cleq axong ka dabau enh dalam Yiang Hadròeh , tàng loq i manoh loq ha-och xam kan tamèt , ² pì oh daq khòh mòeq bàu ti dabau , hadai qmòeq kan loq waq , hadai pajùm mòeq ta Yiang Hadròeh ,qmang aih broq ka au jah lem bùi hi gêh . ³ Apaq broq cleq enh manoh tajênh, toq bang tiang ùh loh cleq , mahaq loq hamon raðeh , ngan mangai qnoeq yeo haqnhrèq ka raðeh . ⁴ rìm ngai ta oh daq apaq enh jah toq ka raðeh mahaq ep ngan lòeq ka wì qnoeq ðìq .

⁵ Drah hadai i mòeq manoh tiah ka Christ ma khoe i , ⁶ Haq daq adàng ka Boc Plình enh baxèm raq , mahaq ùh ngan kan daq adàng ka Boc Plình aih biac ep rùp ka cajap. ⁷ cla haq raq khoe cadac raðeh , yòc chac da mangai hapõng , ðòeq wìa kon mangai. ⁸ Haq khoe rìh tiah ka mangai , haq paqnòh raðeh ka haqneq , iu bàu trùh ma cachit , mech cachit qmòe talong pagat. ⁹ Dài aih raq , Boc Plình majah khoe dèch haq ka haqnhrèq , am ka haq yiniq yeo haqnhrèq ðõng ka yiniq ma qnoeq . ¹⁰ waq toq hi tàng yiniq Chuaq Jesus , rìm toq cràng ta tróc , ta taneh , enh qneq ka taneh , ðìq ðõng ep hacùn . ¹¹ rìm toq rapet ðìq creo ka Chuaq Jesus Christ aih Chuaq , rai dèch kan ranhòm ka Boc Plình aih Baq

¹² Qmang aih , yôiq oh daq da au ma loq waq deh , tiah ka pì khoe iu yôt bàu au , ùh xài toq jò au i mat ta qmat , mahaq manòeq kô jò au arù , thê ùh hnau ka aih hòm , yòc manoh yùq crè tarit ðòeq hu broq kan dèch claih ka cla . ¹³ Majah qmang aih Boc Plình tamèt ta manoh cliac oh daq rai enh rai broq tiaq manoh lem haq . ¹⁴ Yac ka broq cleq apaq rangòt rai mumùc , ¹⁵ ðòeq oh daq rìh taqne nang noe ngang dù kô ,jah wìa kon da Boc Plình , ùh i ka xit ,ùh i habau ,ùh i nòe leq ðòeq hu cwò, taqne nang noe aih, oh daq wèq Trong kan rìh , sreo qngah tiah ka hadreo ta crõng taneh. ¹⁶ ðòeq trùh hì da Christ , au jah catèh khoe ùh hìaq qngwan ka raðeh ma cadàu, ùh qngwan ka ðeh ma xalep . ¹⁷ Yac ka mahim au, ep pùc enh qnhèq ka ramènh tadreo xam bài dahwèq enh manoh lùì da oh daq ,dua manoh au lem bùi , rai lem bùi pajùm ti oh daq . ¹⁸ Oh daq hanoh lem bùi trong aih , rai lem bùiti au .

Timôthê sam Êpha-Phôðit....

¹⁹ Au ngèh enh dalam ka Chuaq Jesus , drah thê Timôthê rênih lam ta oh daq , ðòeq au jah loq pì oh daq qmang leq ,ðòq manoh au jah catèm, ²⁰ Joq qnàng , au ùh i ka cabô ma tiah ka haq aih mòeq manoh ti au ðòeq ðìq ka manoh wiang patih ka pì oh daq. ²¹ mangai leq mangai meh , chaq waq ka jah toq ka raðeh , ùh chaq ka Chuaq Jesus Christ , ²² Mahaq oh daq loq haq aih mangai ùh tablòq manoh , haq khoe pajùm manoh wiang patih ka Bàu lem ti au ,tiah qmòe kon oe deh ti baq. ²³

Aih iq , au majah enh rênih thê haq lam ta oh daq , jò au bu loq ka raðeh kô èh qmang leq . ²⁴ Enh dalam ka Chuaq cla au lùì dèh qmang kô hòm : cla au hadai jah rênih trùh .²⁵ Mahaq manòeq kô , au hèm au ep thê Êpha-Phôðit hlài ta oh daq , haq aih hadai oh daq au , mangai abroq pajùm

ti au , mòeq bua ka au haq aih mangai wê bàu , mangai oh daq khoe thê haq trùh hu patih am yiniq cleq au qnang nan .²⁶ Majah qmang aih ,haq toq tangèh jah glàm diq dǒng ka pì oh daq, haq toq mangò ,majah qmang aih haq tàng doe pì oh daq khoe loq ka haq ùh hrǒc .²⁷ Joq qnàng haq ùh hrǒc ten cachit , mahaq Boc Plinh khoe ha-och ka haq , èh ùh xài toq ka haq mahaq hloe xam ka au , òeq au ùh hìaq khoe mangò loh tam ka mangò hòh .²⁸ Qmang aih au khoe thê haq drah lam, dòq oh daq hnoq haq oh daq hujah manè , au hadai jah yeo ka mangò .²⁹ Qmang aih oh daq khòh yǒc diq ka manoh lem bùi, hu òh mangai ta Chuaq, thê pì i manoh loq ta-iu ka bài mangai qmang aih.³⁰ Majah qmang aih , taiq patih ka Christ dài haq majah hwaq cachit ,haq pì dèh dèm qmòe dèh kan rih ,òeq hu akop hlài bài yiniq oh daq ma khoe ùh jah wiang ka au .

3.....

Kan taq atoq joq qnàng

¹ Yeo loe ka aih hòh , oh daq drah lem bùi enh dalam ka Chuaq , au ùh i cleq ma ep hòq jò achih tam bài yiniq kô ka pì oh daq , majah qmang aih òeq wèq dòq pì jah catèm.

² Ep ngan loq i bài koq ,ep ngan loq i bài mangai patih ngang dù , ep ngan ramènh kat akia patiah .³ Majah qmang aih , bèn kô mangai broq ramènh kat akia joq qnàng , aih taiq bèn canòm ka Yiang Haròeh da Boc Plinh òeq hu patih ka Boc Plinh , catèh dađeh toq enh dalam ka Chuaq Jesus Christ , qnhòq lah hmaq canòm ka xech akia jò leq .

⁴ Qmang aih , ùh xài au ùh i ka nòe hu catèh rađeh ta xech akia kô . Tàng joq mangai qnoeq xoh rađeh kô i nen hu catèh tiaq xech akia kô, au kiang ma yiloe ka aih !⁵ ha-uang bu rahem hì au khoe broq ramènh kat akia , au kô mangai Isorali , nang noe da Bêjamin ,mangai Hêbru , kon da mangai Hêbru , tiaq ranenh , au mòeq bua ka mangai Pharisi ,⁶ Tiaq kan panim nhet , au kô mangai ti rùp Tagop Hadròeh , tiaq trong ranenh au kô taq atoq ùh i ka nòe cwò .⁷ Mahaq, taiq Christ au ngan trong i lòeq aih, budàng kan qngwan diq ,⁸ Au hadai ngan rìm yiniq , budiang kan qngwan ,majah qmang aih , jah loq ka Chuaq Jesus Christ aih ùh hnau dǒng ka yiniq qnoeq, Haq aih Chuaq au, au hadai pì adènh rìm trong ma i lòeq aih, òeq hu tiaq haq . Joq , au hnoq bài yiniq aih budàng bài aròm, òeq au jah Chuaq Jesus Christ .⁹ hujah oe enh dalam ka haq , jah qmang aih ùh xài canòm kan taq atoq cla au jah enh ranenh , mahaq taiq au lùì Chuaq Jesus Christ , aih kan taq atoq enh Boc Plinh khoe jah paqnàng enh qnhèq ka manoh lùì .¹⁰ dòq au jah loq ka haq , loq cwìang itai kan rih hlài da haq , jah pajùm kan xalep ti haq , broq ka au jah tiah ka haq ta kan cachit haq ,¹¹ au ngèh rađeh jah rih hlài enh mangai cachit. ¹² Anoe aih ùh xài au khoe jah bài yiniq kô , hanoh ùh xài au khoe trùh ta kan gèh geo , mahaq au qnang cadàu waq ka jah bài yiniq aih , majah qmang aih , cla au kô khoe jah Chuaq Jesus Christ dùng yǒc .¹³ Au anoe ka pì oh daq , cla au kô , au ùh hèm đeh khoe jah clech trùh nòe .¹⁴ mahaq dua au broq deh mòeq trong raq : hèt đac dǒng bài yiniq enh rù , òeq cadàu tiaq yiniq enh ngèa , dòq hujah yǒc kan baha enh Boc Plinh oe ta plinh khoe creò ka au enh dalam ka Chuaq Jesus Christ .¹⁵ Qmang aih , diq ka bèn mangai ma khoe kàn gèh , ep i manoh aih , tàng joq oh daq hèm trong qnoeq , dua Boc Plinh yǒc trong kô raq òeq sreò qngah ka oh daq .¹⁶ Toq rameh raq : bèn khoe jah pang maneh leq, bèn hadai ep lam qmang aih .

Ngan tiaq dua Phau lô

¹⁷ Manòeq kô pì oh daq , drah top dua au rai ngan bài mangai rih acaq tiaq dua oh daq ma hnoq taqne nhèn .¹⁸ Majah qmang aih , au khoe anoe yôt ka oh daq , manòeq kô au rai hmoe rai anoe hòh : bàc ngai rih tiah qmòe ka mangai tagit ka long pagat da Christ.¹⁹ atiq pulùch da wì haq aih cachit hnhung , wì yǒc dèh cliac broq bùa cla wì haq , yǒc deh kan camaih broq kan rahù , hèm toq trong ta crǒng taneh kô .²⁰ Mahaq bèn kô mangai da diac plinh , enh aih bèn ma tangèh gòm dèh Mangai dèch bèn aih Chuaq Jesus Christ ,²¹ Haq broq ka chac mac ùh nèn da bèn wih wìa

tiah ka chac mac ranhòm da haq , wop tiaq cwìang itai da haq khoe i òòeq broq rìm yiniq ep iu tiaq .

Bàu pariaq qnoeq

4.....

¹ Manòeq kô , òìq òõng pì oh daq , aih bài mangai au òìq jaq loq waq òèh enh nèh , pì aih kan lem bùi da au, cadoh ranhòm da au , pì ep yòng ma cajap enh dalam ka Chuaq oq . ² Au pariaq Êvôđi xam Sinticô ep mòeq manoh ta Chuaq . ³ Joq au anoe òèh ka ìh , mangai bua joq qnàng da au , ìh wiang ti wa baiq ngai gucadri aih òìq , majah qmang aih wa aih hanoh khoe wiang xalep ka Bàu lem ti au xam Còlêman ,xam bài bua bèn maqnoeq , aih la bài mangai yiniq wì haq khoe jah achih ta hset kan rih .

⁴ Drah lem bùi yôt ta Chuaq .Au anoe hòm : drah lem bùi beq ! ⁵ Dòq rìm ngai jah hnoq kan loq bùi da oh daq. Chuaq khoe haten . ⁶ Òh dùh lèt òèh , mahaq tarìm trong yỗc bàu waiq khàn, creò òang , xam kan manè apôi òòeq hu òèch bài yiniq ràðeh ma enh waiq òang Boc Plinh . ⁷ Kan catèm da Boc Plinh yeo haqnhèq ka rìm trong bèn ma loq , jah wèq cliac manoh oh daq enh dalam ka Chuaq Jesus Christ .

⁸ Pulùch aih ,yôi yôiq òìq òõng ka oh daq , trong leq ma joq qnàng ,trong leq khòh padèch , trong leq khòh manè , trong leq taq atoq ,trong leq lem hreo , trong leq khòh waq , trong leq i bàu lem , trong leq ma taji , aih pì oh daq ep hèm trùh . ⁹ Trong leq oh daq khoe hỏc khoe jah , khoe tàng , khoe hnoq ajang au , broq beq , aih èh Boc Plinh da kan catèm hi oe ti oh daq .

Manoh cliac da mangai Philip

¹⁰ Enh dalam ka Chuaq au jah lem bùi haraya , majah qmang aih manòeq kô oh daq khoe hmàng trùh au hòm, trong aih dua oh daq khoe hèm trùh yôt , mahaq qnhòq glàm jò hu paqnoh . ¹¹ Òh xài au enh anoe òèh qnang nan , majah qmang aih , au khoe axràam yac ka glàm qmang leq , manoh au dua lem bùi . ¹² Au loq rih jò ma dahênh , hadai loq rih jò ma tàu tia . Rìm trong ,rìm nòe au òìq axràam, yac ka panàc yac ka pangot, yac ka i rah yac ka òh , dua òh troq cleq. ¹³ Au broq jah rìm yiniq aih canòm ka Chuaq tam padren ka au . ¹⁴ Mahaq oh daq khoe wiang hanò ka au jò nan no, aih raq khoe broq biàc lem .

¹⁵ Òìq ka oh daq oe ta Philip , pì hadai loq jò au baxèm hnài Bàu lem , jò au loh khoe ka Maxêđoan, enh gùng ka Tagop Hadròeh da pì , aih òh i Tagop leq waq taqmùt ti au , òòeq hu wiang hnhu am qmòeq cleq . ¹⁶ majah qmang aih , jò au oe raq ta Têsalônica ,oh daq khoe mòeq baiq yàng gòe aràng dahwèq au ma qnang nan . ¹⁷ Anoe aih, òh xài au ngèh ka dahwèq , mahaq au ngèh enh dahwèq aih oh daq jah loh pli yeo bàc hòm. ¹⁸ Qmang aih , manòeq kô au khoe jah tòm taih , qnang òh òìq òh òài, au khoe tàu tia ,majah qmang aih au khoe jah òõng dahwèq pì gòe aràng ka au ajang Êpbaphôđit tiah qmòe kan xua thùm , aih la ramènìh Boc Plinh ma khoe òi rai lem manoh. ¹⁹ Èh Boc Plinh da au ,broq ka oh daq jah tàu tia rìm yiniq oh daq ma nhet ka waq wop tiaq kan pagròng da haq oe tanòe ranhòm enh dalam ka Chuaq Jesus Christ . ²⁰ Waiq kan ranhòm hlài òìq ta Boc Plinh , aih Baq da bèn mòeq òòeq òh lùch ! Amen.

²¹ Au i bàu hmàiìh ka òìq òõng mangai hadròeh da Chuaq Jesus Christ , oh daq qnang oe pajùm ti au hadai tanap bàu hmàiìh trùh oh daq ,²² Òìq òõng mangai hadròeh gùng kô hadai i bàu hmàiìh ka oh daq , bài mangai oe ta hnim Sêsa aih kiang ma yeo nhet .

²³ Waiq kan tabàiìh da Chuaq Jesus Christ jah oe ta dalam oh daq .